

Baccalauréat général et technologique
Créole guadeloupéen
Classe de première
Compréhension de l'écrit et expression écrite
(3^e trimestre)

<u>Niveau visé</u> LVB : A2-B1	<u>Durée de l'épreuve</u> 1 h 30	<u>Barème 20 points</u> CE : 10 points EE : 10 points
---	---	--

L'ensemble du sujet porte sur l'axe 2 du programme « **Espace privé et espace public** ».

Il s'organise en deux parties :

- 1- Compréhension de l'écrit**
- 2- Expression écrite**

Jou a Latousen

Dépi koté uitè-d-maten, man Jòlivè té ja gannyé bouji é flè pou pòté asi tonm a défen mari a'y Jozéfa. Dé jou avan sa, i té ja voyé pli gran tiboug a'y nétwayé tonm, pentiré kwa, woumaké non a papa a'y asi kwa-la, ranjé tout kal-a-lanbi ki té tonbé. Jou a Latousen, apré i fin kuit manjé, nétwayé kaz, i alé mété sé flè-la asi tonm-la. Té ni
5 moun kon pa ni adan simityè-la : moun ka pentiré, ka ranjé tonm èvè kavo, ka pòté flè, ka balyé, ka saklé : onsèl alévini !

Lè i vwè tout biten olendeng ba Jozéfa, i viré akaz a'y apré détwà ti kozé. I pasé wòb alaprémidi a'y, i manjé, i ay fè on ti pijézyé apré i lavé vèsèl.

Koté twazè i fè tout sé timoun-la ay fè twalèt, i pennyé tèt a yo, limenm i paré'y. Yo pati
10 koté katrè mwennka pou ay mès katrè. Yo té ka rété toupré légliz-la. Apré lanmès, yo ay asi tonm a tout fanmi a yo, yo mété yonn dé bouji kotésit, kotéla.

Solèy té ja kouché, ou té ka vwè déotwa ti zétwal adan syèl-la. Adan simityè-la, bouji té konmansé limé. Yo té ka kléré sé branch a filao-la. Gadé sa olwen ou té ké di sé té difé pri adan on pyès kann. Moun té ka monté-é-désann kon lawa a gran tété, é tout
15 kavo té bèl, tout tonb té olendeng. Ou té ka jous vwè moun twota té maré, té ka lévé détwà kal-a-lanbi toujou.

Té ni nonm, té ni fanm, té ni jennjan ka pwofité pou fè bas an simityè-la. Té ni timoun manman yo té ka kenbé pa men. Yo té bizwen gadé toupatou, tèt a yo té ka konnyé asi moun té ka vin douvan oben dèyè. Moun té ka ri, moun té ka palé, yonn té ka
20 kriyé lòt. Moun té ka bo. Timoun ka kouri, ka voyé kaka-bouji dèyè tèt a moun, ka fè lantèn èvè bwèt a bouji vid.

Douvan pòt-la, machann té ka vann sik, bonbon pistach, marinad cho, sòwbé, sinobòl, chiklèt. Moun ka pati té ka bouré épi moun té ka rantré. Man Jolivyè limé bouji asi tonm a mari a'y, i fè chak timoun limé ta yo. Détwà fanmi, détwà zanmi té ja pasé avan, é
25 yo té mété yonndé bouji ba Jozéfa. Toupannnan i té la, i jwenn moun i pa té vwè santan-millan, yo té vin liminé mò a yo : moun pa asi Granntè, moun pa asi Pwentnwa, jis moun Marigalant. I viré akaz a'y koté névé. Simityè-la té plen moun toujou, mé on machann chabon té ka fè lantoun adan syèl-la, lapli té ka vin. Mé a pa lapli-lasa ki té ké opozé'y désann Kannfò koté zanmi a'y lé Masanmbo pou ay vwè Grap-a-kongo-la.

Silvyàn Tèlchid

Bwa pou nou alé, Édisyon Jasor, 2002

1- Compréhension de l'écrit (10 points)

Maké sa ou konprann parapòt a sa ou li adan dokiman-la. Daprè-w, poukirézon yo maké tèks-lasa?

2- Expression écrite (10 points)

Chwazi yonn adan sé dé sijé-lasa. Maké tout lidé a-w an kréyòl.

Sujet A

Ou tini on zanmi ki ni labitid onoré mò a-y akaz a-y an rèkèyman davwa pou li sé omaj ki pé fèt yenki adan on èspas familyal é privé. Pou latousen, ou désidé menné-y vwè tousa ou ka fè an péryòd-lasa pou pé montré-y é èspliké-y kijan ou pé onoré mò-la andéwò a kaz, an lyannaj èvè moun. (omwen 12 lin)

Sujet B

Ès ou ka trouvé modèl mantalite ka fè chakmoun ka woulé plizanpli pou yomenm an sosyété-la ka pé èspliké pouki moun pa gyè k'ay onoré mò a yo an simityè ankò.

Si ou ka trouvé sa pé on lèsplikasyon, di-nou pouki é ban-nou santiman a-w asou sa.

Si ou ka trouvé a pa on lèsplikasyon ou pé fè fon anlè-y, di-nou ka ki silon vou pé èspliké sityasyon-lasa èvè ban-nou santiman a-w asou sa osi. (omwen 12 lin)